

# Cressi cun plui lenghis

**MAMAN! La prime transmission televisive par divertîsi e par imparâ il furlan**

Ce isal di biel par television pai fruts e pes fameis? I amiradôrs di Maman! a savessin rispindi intun marilamp! La prime transmission dute par furlan che e fâs divertî, cjanât e zuiâ i fruts ducj i vinars dal mês aes 17.45, e je rivade ae seconde stagjon e e puarte il non di une des manieris plui dolciis par saludâ in marilenghe: Maman!.

Realizade de Agenzie Regionâl pe Lenghe Furlane e di Telefriuli, Maman!, cuntun stîl spontani e divertent, e par mieç dal zûc e de narazion, e met in contat i fruts cul plurilinguism e cui vantaçs cognitîfs comprovâts che a derivin dal ûs di plui lenghis za de etât plui tenere.

Intune cjasute plene di colôrs e

un biel zardin cun tantis rosutis, a vivin Daria Miani, mestre apassionade di marilenghe, la atore Chiara Donada e il tenar gjatut Vigji: insieme a passin dopodimisdîs une vore divertents a cjanât cjançons ple-

nis di ligrie scritis di Daria e musicadis di Flaviano Miani, a fasin zûcs, a contin barzaletis, a lein bielis contis e ogni tant al passe a cjatâlis Siôr Timp, interpretât dal atôr Manuel Buttus, personaç stravagant che al puarte gnovis sorpresis in ogni pontade.

Ma il divertiment nol è mai avonde, parcè che a insiorâ il dopomisdî, a son ancje lis gnovis aventuris



di Tui e Tuie, doi tuiuts afetuôs ma un pôc pastrocjons, che a fevelin furlan; in plui e je la presince dai fruts che di cjase a partecipin mandant il lôr videos cuntun messaç, une cjançon o une filastrocje par furlan. Di Maman! al è pussibil viodi dutis lis pontadis fatis fin cumò sul sît de Arlef ([www.arlef.it](http://www.arlef.it)) e Telefriuli ma ancje divertîsi cul insert in cjarte che al jes sul setemanâl Il Friuli plen di rubrichis e di aprofondiments curâts di Daria. Maman! no je dome une transmission par passâ il timp e par divertîsi cun contignûts educatîfs origjinâi e un ûs de lenghe une vore curât: rivade a passe 35 pontadis, e ufris sponts e materiâi za pronts pe didatiche e pal aprendiment de lenghe furlane a scuele e a cjase, pai frutins plui piçui e par chei za granduts.

Par partecipâ a Maman!  
email: [maman@tvstar.com](mailto:maman@tvstar.com)  
mob. 333 7202814

Pagine par cure de ARLeF Agenzie Regionâl pe Lenghe Furlane



**ARLeF** AGENZIE  
REGJONÂL  
PE LENGHE  
FURLANE